



HVndingus omnis generis uirtutibus præditus, Saxonum rex extitit, circa annum mundi ter millesimum centesimum uigesimū, quo tempore Roë & Helgo fratres apud Danos & Sueonas rebus præessent. Cum autem Helgo maris imperiū nactus esset, de improviso Saxones in Cymbrico Chersoneso (quæ & Iutia dicitur) inuasit. Ita que Hundingus copijs collectis, huic obuiam processit, atq; ad urbē Stadium, instructa acie, hostem expectauit. Id cum Helgo uidisset, regi Saxonum persuadere cœpit, ut totam belli fortunam secum Duello finiret. Tum enim potissimum utriusq; uirtutem patere posse. Cum itaq; Hundingus sua uirtute confusus, eam petitionem negare nollet, ne turpitudinis notam suæ genti inureret, Duellum inter reges, utroq; exercitu spectante, inceptum fuit. Ibi utriusq; uirtus diu ancipiti uictoria satis superq; spectata est. Tandem tamen Helgo, cui id genus certaminis notius erat, superior euasit. Ab eo tempore Cymbrica Chersonesus Saxonibus adempta, in Danorum potestatem peruenit, ac ad hodiernum diem usq; permansit, quantumuis Saxones multoties eā armis recuperare tentarint. Sax. lib. secundo. Crantz. in Sax. lib. 1. cap. 4.